

# Usah gelojoh bangunkan pelancongan tanah tinggi



Dr Syakir Amir Ab Rahman  
[bhnews@bh.com.my](mailto:bhnews@bh.com.my)

**Pelancongan** tanah tinggi adalah antara tarikan utama industri pelancongan negara. Cameron Highlands, Bukit Fraser, Bukit Larut, Bukit Bendera, Bukit Tinggi, Gunung Jerai, Taman Negara Kinabalu dan Taman Negara Mulu adalah antara destinasi tanah tinggi popular dalam kalangan pelancong domestik serta antarabangsa.

Malaysia berpotensi besar untuk memperkembangkan pelancongan tanah tinggi kerana mempunyai kepelbagaian ekosistem hutan hujan tropika unik dan kaya nilai saintifik.

Pembangunan tanah tinggi terutama bagi tujuan pelancongan mewujudkan peluang dan sumber ekonomi kepada masyarakat setempat mencari pendapatan. Taman Negara Kinabalu misalnya membuka banyak peluang pekerjaan kepada masyarakat tempatan seperti malim gunung, perusahan inap desa, pemandu pelancong dan banyak lagi.

Pelancongan tanah tinggi juga memberi manfaat kepada masyarakat Orang Asli di kawasan sekitarnya. Misalnya, Orang Asli di Cameron Highlands yang terbabit dalam perladangan teh dan menjual hasil kraf tangan serta hasil hutan di sepanjang Jalan Tapah-Cameron.

Kebanyakan destinasi pelancongan tanah tinggi di Malaysia berada di ketinggian lebih 300 meter serta dikategorikan sebagai kawasan sensitif alam sekitar (KSAS) Tahap 1, 2 dan 3.

Justeru, Garis Panduan Perancangan Pembangunan di Kawasan Bukit dan Tanah Tinggi serta Garis Panduan Pemuliharaan dan Pembangunan Kawasan Sensitif Alam Sekitar (KSAS) disediakan Jabatan Perancangan Bandar dan Desa (PLAN Malaysia) perlu dijadikan rujukan untuk sebarang pembangunan.

## Lindungi biodiversiti, alam sekitar

Hal ini bertujuan untuk memastikan tanah tinggi dilindungi daripada sebarang impak buruk pembangunan yang boleh mengganggu biodiversiti dan alam sekitar kawasan tinggi berkenaan.

Pembangunan tanah tinggi negara bermula sejak zaman penjajahan British. Kawasan ini dibangunkan penjajah sebagai kawasan rehat dan pusat rawatan bersesuaian dengan cuaca dan suhu di negara asal mereka.

Kini, hampir 30 gunung dan bukit di Malaysia termasuk Sabah dan Sarawak amat berpotensi dijadikan sebagai destinasi pelancongan khususnya kepada mereka gemar aktiviti lasak seperti pendakian gunung dan melihat keunikan habitat flora dan fauna.

Bukit Taisho di Bahau Negeri Sembilan adalah antara lokasi berupaya menarik pengunjung ber-

keluarga atas faktor lokasi strategik, kecerunan rendah dan flora fauna boleh dijadikan sumber bagi pembelajaran kepada anak.

Namun begitu, sejak puluhan tahun lalu, kawasan tanah tinggi sering diteroka atau diceroboh menyebabkan penebangan hutan menjadi tidak terkawal. Aktiviti penerokaan bertujuan untuk pertanian, perumahan dan membina kawasan baharu menjadi tanah terdedah kepada pelbagai bahaya dan bencana.

Pendidikan dan kesedaran terhadap penjagaan alam sekitar perlu terus diberikan, bukan sahaja kepada kanak-kanak atau murid, bahkan perlu diganda kepada orang dewasa.

Selain itu, penggunaan teknologi digital menekankan aspek pelancongan pintar perlu diperluaskan. Pemantauan dan penguatkuasaan digital dapat dilakukan bagi memastikan tiada penceroohan, pembalakan dan pembangunan haram dibuat di tanah tinggi.

Kedatangan pelancong juga dapat dikawal dengan menggunakan teknologi digital seperti pendaftaran dan pengimbasan supaya pelancong dapat diberikan amaran sekiranya tanah tinggi melampaui kapasiti daya tampung.

Bagi memastikan pelancongan tanah tinggi kekal lestari sebagai tarikan utama pelancongan negara, semua pihak berkuasa perlu memandang serius dalam inisiatif pemeliharaan, pemuliharaan dan pemantauan kawasan tanah tinggi.